

第一篇

編號 1 號

【承水】林伯殷原作

落水咧！落水咧！看著大水點趲等風對佢掃過來，心肝肚正在該想，這陣水望還久哪！望到圳溝燥忒、河壩燥忒、水庫乜燥忒咧！望到連田泥就必開來咧！佢正想愛摻手伸出屋簷下摸一下久見个雨水，盲知無兩下，屋簷水就瀉往出，打在地泥下滴滴落<sup>1</sup>，大嬲牯聲提醒佢，講這水毋會細哦，仰做得打爽忒！佢黏時去尋水桶放在屋簷下承水，想……等水張淦个時節，好倒落水庫貯起來，看做得毋使再過限水無？

看等、看等，水桶承个水緊來緊淦，佢个心肝頭就越來越歡喜，感覺落大水還好哪！旱恁久咧，滿哪都燥絲絲，有大水來解決欠水，還有麼个比這較好个？佢个心肝變到盡貪，想……一陣大水仰會罇，係水無落較久兜、落較多兜，摻水庫撐到飽飽，若係太陽公三、兩下又弄等出來<sup>2</sup>，該就無結煞咧！又毋知愛望水望到幾時？好得屋簷水還係直直瀉，水桶還係當當承，一桶、兩桶、三桶……，水桶承个水淦了又淦，佢斯像人看著水庫个水溢

出來<sup>3</sup>樣，實在還歡喜哪！

過一站，水變細咧，屋簷水變成一點一點慢慢跌到水桶肚，佢聽著涿、涿、涿个聲音，忽然間想起老屋个承水聲，該屋外落大水，屋肚落細水个時節，地泥下排等个盆頭鉢仔，分屋頂跌下來个水點打出滴滴涿涿<sup>4</sup>个聲音，還會隨等落大水變遽、落細水變慢，暗晡頭係睡在眠床頂，用聽就知外背个水落有幾大。係堵著風搓，水掃掃滾<sup>5</sup>，又聽著屋肚滴滴涿涿个承水聲，該就愛大愁屋頂毋知會承毋贏風雨，嘎塌下來無！平平係承水，仰在屋簷下摻屋肚會有恁大个爭差呢？好得這下人大體戴樓屋，毋使再過看著落大水就愁屋肚愛承水無！

天公還惜佢哪！連連續續又落好久个水，各地水庫个水位升加已多，照理講，大家較毋使驚無水好用咧，毋過，佢還係知有落水，就會尋桶放在屋簷下承水，想留加兜水來用，聽等該滴滴涿涿个聲音，佢个心肝肚無半點愁慮，嘎有一種當滿足个感覺。

<sup>3</sup> 溢出來：音 pun chud loi；滿出來。

<sup>4</sup> 滴滴涿涿：音 did` did` dug` dug`；形容水滴滴在地面或物體上所發出的聲音。

<sup>5</sup> 掃掃滾：音 so` so` gun`；用槍枝連續掃射的樣子。

<sup>1</sup> 滴滴落落：音 did` did` dab` dab`；形容雨滴打在地面或物體上所發出的聲音。

<sup>2</sup> 弄等出來：音 nung` nen` chud loi；鑽著出來。

第二篇

編號 3 號

【家鄉个名產】朱淑琴原作

車仔行過鬧熱个都市，來到好山好水个莊下。白白个雲在天頂游啊游仔，青里里个田連到山腳下，風涼沁涼沁，一陣陣个青草味鑽落鼻空，這就係个家鄉——臺灣个長壽村「關西」。講著關西，就會分人想著有名个「仙草」咧！

阿公、阿婆戴在關西，阿公係煞猛个耕種人，屋下也有種仙草。嫩嫩幼幼个仙草，葉仔細細皮、有絨毛，矮矮仔無幾高，一大遍仙草田，差毋多半年就做得收成，割下來再過放在禾埕晒，晒到燥燥，就做得煮來食。

「阿公，該草仰安到仙草呢？」細細該下，當好問支柄來擎<sup>1</sup>个，緊問阿公。阿公就撈住講：「頭擺人做田事、行山路，日頭上煎下燂<sup>2</sup>，晒到頭暈腦疼懶拐拐仔，恁堵好！毋知麼儕好心煮仙草茶來分大家食，大家咁了毋單淨毋會熱著！還嘎精神起來，斯講該怕係仙人送草來个哦！還有一種講法：仙草茶煮一鑊，撈兜太白粉攪攪仔，鮮鮮个變醺醺咧，看起來當大鑊，斯講，該怕係

仙人來變个！所以『仙草』也安到『仙人草』。」

仙草晒燥來燂水，清涼解毒人人愛。一坵仙草剝剝仔，加兜冰砵、撈兜糖，軟軟滑滑透心涼！日頭烈烈个熱天，食仙草最退火；冷天時節，寒風咻咻滾，冷到嘍嘍掣，一碗燒仙草，加紅豆、綠豆撈地豆，無斯芋圓、粉圓、細板圓共下食，燒氣衝天，食到笑連連！滑溜个仙草，對喉嚨頭溜到肚屎肚，燒暖个感覺也流到歸膺身，實在還享受哦！

仙草也做得做鹹个料理，阿婆用仙草來燉土雞仔，加兜紅棗、枸杞落去，烏金烏金个雞湯，有特別錫人个味緒，看著口水就溶溶跌！這仙草雞湯分人補身體、有元氣，偃見擺都食到舐嘴撒鼻<sup>3</sup>！

時代緊進步，仙草經過千年百載無分人擢忒，顛倒還較受人歡迎！傳統市場、超級市場，全有佢个身影。這下，最時行个手搖飲料店，仙草乳茶長透賣到淨淨、空空！去到關西名產店，唉哦！還有即溶仙草粉、仙草麵條、仙草茶箍哦！

「一寸土地一寸情，千金難買故鄉情。」仙草毋單淨係客家人愛，還較係大家都知个好名產。實在講：天地精華在這草町<sup>4</sup>，清涼補肝又退火，冷燒鹹甜滋味好，關西仙草最係寶！想到家鄉个名產，偃就感覺歡喜又光榮啊！

<sup>1</sup> 問支柄來擎：音 mun<sup>ˊ</sup> gi<sup>ˊ</sup> biang<sup>ˊ</sup> loi kia；打破砂鍋問到底。

<sup>2</sup> 上煎下燂：音 shong<sup>+</sup> zien<sup>ˊ</sup> ha<sup>ˊ</sup> bed；形容烈日當空非常炎熱。

<sup>3</sup> 舐嘴撒鼻：音 she<sup>ˊ</sup> zhoi<sup>ˊ</sup> liab<sup>ˊ</sup> pi<sup>+</sup>；食物美味讓人意猶未盡。

<sup>4</sup> 草町：音 co<sup>ˊ</sup> nen<sup>ˊ</sup>；草裡。